

Kalaallit Nunaanni aningaasaqarnikkut inatsisaasut naleqqussarnissaannut peqqussutitut arlalinnut Namminersorlutik Oqartussat oqaaseqaatissaat pillugit Inatsisartut aalajangiussassaattut siunnersuut.

(Inuussutissarsiornermut, Suliffeqarnermut Niuernermullu Naalakkersuisoq)

Akissutitut allakkiaq

(Inuussutissarsiornermut, Suliffeqarnermut Niuernermullu Naalakkersuisoq)

Aappassaaneerera

Inuussutissarsiornermut Ataatsimiititaliaq nalunaarummut sukumiisumik suliaqarsimaneranik Naalakkersuisut sinnerlugit qutsaviginiarpara. Aalajangiussassatut siunnersuut partiinit tamanit tapersorsorneqarnera Naalakkersuisut iluarinnillutik paasisinnaavaat.

Siunnersuut 2015-imi juunip 9-annit juulip 15-iannut tusarniaasarfittut nittartakkami nalinginnarmik tusarniaassutigineqartoq Atassummit oqaaseqartartumut siunnersuummik tusarniaaneq pillugu siullermeerinninnermi apeqqutilliisumut ilisimatitsissutigissavara Tamanna ilutigalugu siunnersuut tusarniaaffissatut toqqartukkanut, ilanngullugu BankNordikimut nassiussorneqarpoq.

Tamatuma saniatigut GrønlandsBANKENilut siunnersuut itisiliiffigisatut oqaluuserineqarpoq.

Aningaaseriviup annertussusia pissutigalugu GrønlandsBANKEN Kalaallit Nunaannut imatut immikkut ittumik pingaaruteqarmat aningaaserivik inuiaqatigiinnut tamanut aningaaserivittut toqqarneqarsinnaavoq. Tamanna Aningaasaqarnermut Nakkutilliisoqarfik (Finanstilsynet) sullissisarfinnut allanut naleqqiullugu GrønlandsBANKENimut piunasaqaatinik sakkortunerusunik aalajangersaasinnaaneranik isumaqarpoq.

BankNordik tassaavoq savalimmiormiuni aningaaserivissuup ilaa, taamatuttaarlu Savalimmiunut assngisumik immikkut ittumik pingaaruteqarpoq. Savalimmiunut aningaasaqarnermik inatsisaasuni assingusunik aalajangersakkanik piviusunngortitsinerit savalimmiormiut aningaaseriviisa oqartussaasuisalu akornanni oqaloqatigiinnerit kingorna pisarput.

Taamatut oqaaseqarlutik aalajangiussassatut siunnersuutip akuersissutiginnissaanut Naalakkersuisut innersuussipput.